

摘藻堂四庫全書薈要

集部

欽定四庫全書薈要

集部

聖祖仁皇帝御製文二集卷一至三

詳校官原任編修臣徐立綱

欽定四庫全書薈要

聖祖仁皇帝御製文第二集卷一目錄

勅諭

諭內閣九卿詹事科道

諭內閣

諭內閣

諭大學士勒德洪明珠

諭大學士勒德洪明珠



諭大學士勒德洪明珠

諭大學士勒德洪明珠

諭大學士勒德洪明珠尚書科爾坤哈占侍郎鄂爾

多郭丕

諭大學士勒德洪明珠尚書科爾坤哈占侍郎

鄂爾多郭丕

諭大學士勒德洪尚書科爾坤哈占侍郎鄂爾

多

諭大學士勒德洪明珠

諭大學士勒德洪明珠

諭大學士勒德洪明珠

諭大學士勒德洪明珠

諭按察使于成龍

諭吏部

諭大學士勒德洪明珠

欽定四庫全書薈要卷一萬三千二十九

集部

聖祖仁皇帝御製文第二集卷一

勅諭

諭內閣九卿詹事科道

朕聞部院小官及筆帖式在差者輒令地方官迎迓以請朕安為名若所遣者近御人員地方官請安理所宜然若小官及筆帖式等輒令地方官以請安迎之殊不當於理宜禁之卿等議以聞康熙二十三年十一月三

十日

諭內閣

穆敦請安所上章其還之

山陵守視官員此後欲來請安者毋特具疏告之侍衛
轉陳奏守視

永陵

福陵

昭陵官員人等欲來省其親戚及以己私事欲來者各

聽其自來但於職事無所曠斯已耳若曠其職事而來者則重罪之其悉示知此意康熙二十三年十二月初六日

諭內閣

泉林寺泗水之源在焉而吾孔子之所游息也朕親歷其地其樹之碑令所司議以聞康熙二十三年十二月初六日

諭大學士勒德洪明珠

山東河南山西三省各遣兵部司官一員前往派出征俄羅斯善用藤牌官兵除八旗察取外著於福建投誠安插墾荒之內願效力官兵詳察揀選善用藤牌者以足五百名之數調發前來并令曉諭此項官兵汝等往征俄羅斯今冬即可回至原住地方所調官兵該省大吏酌量給與養贍妻子之資整備其本身行裝以善遣之其傳與兵部康熙二十三年十二月初八日

諭大學士勒德洪明珠

議政王大臣議奏不發京師兵者議良是但直隸山東
河南山西四省綠旗兵非經歷征戰之人也且黑龍江
火器甚多不須更增朕意於山東河南山西安插墾荒
福建投誠能用藤牌官兵及隸八旗福建投誠官兵內
選五百名令臺灣投誠何佑率之前往並諭佑傳示官
兵言今年冬即還師也薩布蘇起自卑微每見其陳奏
移會事宜皆瞻顧支吾遷延時日觀此即四月進兵亦
不過刈其禾而食之已耳所指示之事必不能奏効也

此皆謫遣黑龍江狂劣之徒不樂成事私議阻撓而薩
布蘇本自微末重視此輩難於違拂其意以故如此兵
事所關甚鉅最宜籌畫精詳必期有濟而後從事若所
謀輕率又如昔時明安達禮輩以致退師反令俄羅斯
有逞心矣今自京師遣一賢能大臣總領軍事俟取雅
克薩之城令回京師又於盛京遣兵五百名代黑龍江
兵防守城郭勤事耕種俟進剿之兵回時即遣還盛京
此耕種事務令戶部堂官一員往董領之俾勤力作觀

俄羅斯所云早收穀種即吾土所種之春麥也今我師亦多種春麥大麥油麥於隕霜之前六月皆可收穫如此則不以出師之故致曠一年耕作矣又綠旗籐牌兵增給馬二千匹此馬於京師各佐領以至內府佐領各捐助馬一騎其不敷者發上駟院馬二百匹兵部馬二百匹再不敷者王以下堂官以上捐助以足其數發往盛京盛京各佐領出馬二千匹照曩時嚴加監視飼令肥壯以俟之更替京師所發之馬前往馬喇等所飼養

之馬已預備於齊七哈里地方聞其間止有十八日之
程盛京之馬行至齊七哈里沿途若有倒斃者於馬喇
處補給發往如此則我軍之馬不致缺乏矣此遣往綠
旗兵令各攜砲子或十枚或二十枚以往朕意如此措
施似大有裨益議政王貝勒大臣逐一詳議具奏特諭
康熙二十三年十二月初八日

諭大學士勒德洪明珠

遣往黑龍江兵需用藤牌聞閩省製有雙層藤牌甚佳

令福建提督施琅取其佳者四百面竝揀擇需用大刀
從福建由浙江江南山東迅速遞送京師事關軍機勿
得遲悞特諭康熙二十三年十二月十四日

諭大學士勒德洪明珠

爾等可傳諭議政王貝勒大臣征戰本非佳事不得已
而後用之嚮者俄羅斯無故侵擾我邊陲後復漸入越
我疆界索倫黑真費雅喀奇勒爾等處之人皆被擾害
不獲寧居掠其家口納其逋逃搶其邨落奪其貂皮因

彼頻年肆害曾屢行曉諭曰爾等無故入我邊境恣行搶奪朕何難遣發大兵將爾等撲滅但不忍即行殄戮故屢行曉諭欲令撤還爾衆歸我逋逃各居疆土互相貿易寧靜無事以安生業數次遣人亦於來使處屢有文移俄羅斯總無一次回報反於黑真費雅喀之地仍行搶奪用是發兵於愛渾地方以堵截俄羅斯所行之路乃俄羅斯仍居我邊界不歸我逋逃今雖應行剿滅但念用兵本非佳事我惟順天而行將大兵前臨雅克

薩以朕諭旨遣人宣布俄羅斯諭之曰屢次令爾退回
歸我逋逃之人遣使馳書者數矣數年以來未有一次
信息回報既不歸我逋逃反入我境內擾害地方搶掠
人民妻子肆行不止為此遣發大兵前往堵截爾等所
行之路於恒滾等處之俄羅斯許其歸順待以不死而
生養之汝等仍不退離雅克薩地方故遣發大兵往行
征討我師威力豈難剿撲爾等若即破壞爾城郭殄滅
爾噍類自立成灰燼矣豈惟爾等俄羅斯普天之下率

土之人朕皆惻然仁愛咸欲令其靜寧無事各遂休養
故不忍將爾等遽行殄滅屢次曉諭爾等欲各安生業
共享太平則當即返雅庫地方以雅庫為界於彼處捕
取貂皮於彼土收其物產勿入我邊界恣意妄行汝能
將已納之逋逃歸還則降我之俄羅斯亦發還於汝如
此則邊塞貿易可通咸安樂利而兵革偃息生民無所
擾害矣若執迷不悟罔遵諭旨仍行抗拒則大兵進剿
摧破雅克薩之城且盡行誅戮矣可遣人前往明白開

示俄羅斯果能遵旨即回以雅庫為界而我兵駐劄愛
渾則於雅克薩地方安置哨兵令疆界寧謐儻仍行抗
拒則大兵相機而行若不如是周詳區畫今雖取雅克
薩我兵進則俄羅斯退我兵還則俄羅斯又進用兵無
止息之日而生民亦不獲安矣應否如此議政王貝勒
大臣會議具奏康熙二十三年十二月十六日

諭大學士勒德洪明珠尚書科爾坤侍郎鄂爾多

郭丕

黑龍江兵食所關最為重要必當謀恒足之道爾等與議政王貝勒大臣會同詳議以聞又遣往黑龍江管轄綠旗兵丁之官甚多兵少而管轄之官多甚無益也可度量派官而兵更宜酌減以四百名為率亦既足用而兵糧不致過費且近冬之際綠旗兵在彼地殊無所事可由蒙古境每百名分為一隊俾遞送之既非久可至而兵糧又不至糜費矣其一併詳議以聞康熙二十四年正月二十七日

諭大學士勒德洪明珠尚書科爾坤哈占侍郎鄂

爾多郭丕

薩布蘇等自壞其田器盡斃其耕牛者若輩以為但於諸務曠誤以致廢事則令其離黑龍江而歸矣是其意也凡諸事務職任之人當各盡其心豫為籌度期無廢曠厥職其皆推諉於君上可乎凡於政務朕存之於心殫竭思慮是以於事不致廢曠若以謂有職司之人而專倚若輩聽其為之則軍機之事其必至於貽誤矣薩

布蘇等其令議政諸臣察議之康熙二十四年正月二十七日

諭大學士勒德洪尚書科爾坤哈占侍郎鄂爾多科爾沁十旗今歲進貢牛羊乳酒酥油諸物皆毋貢至京師悉送之黑龍江以給軍士籍其數奏聞仍以進貢例賞賚之如此似於兵丁有益議政王貝勒大臣會議以聞康熙二十四年正月二十七日

諭大學士勒德洪明珠

馬喇自差遣以來効力良多且深諳雅克薩地方情形
其授以副都統品級此兵事令往叅謀議特諭康熙二
十四年正月二十七日

諭大學士勒德洪明珠

林興珠乃勤勞効力之人且列侯爵可令叅謀議著彭
春等恒愛敬而厚視之特諭康熙二十四年正月二十
八日

諭大學士勒德洪明珠

遣往征討雅克薩之綠旗官弁各照其現在職銜兵部
新給以印信劄付而遣之特諭康熙二十四年正月二
十八日

諭大學士勒德洪明珠

彭春等至黑龍江時有移會雅克薩城文書用黑龍江
將軍印遣發之特諭康熙二十四年正月二十八日

諭按察使于成龍

茲以海口關係運河下流特命爾督理高寶等處下河

事務管轄所屬附近海口州縣等處地方車路等河并串場河白駒丁溪草堰場等口逐一確勘挑濬深闊使高郵等州縣減水壩一帶運河水口引流入海仍撫綏黎民勤宣德意約束衙門官吏胥役恪遵法紀勿致作弊生事嚴飭所屬海口有司等官各循職掌勿使糜費錢糧怠弛曠廢一應海口俱宜善加挑濬毋令沙土淤淺以致水勢漲漫淹沒民間廬舍田疇其挑河一切事宜竝應設官分任之處均申詳總河具題定奪勅中開

載未盡應行事務爾悉申詳總河題請遵行歲終將所
修工程及支用錢糧細數一竝造冊轉報總河題銷仍
聽總河節制爾膺茲委任須持廉秉公精心殫力俾水
患永除民復舊業惟爾之功如或執拗乖張因循冒破
殃民悞國責有所歸爾其慎之故勅康熙二十四年二
月初四日

諭吏部

國家設立翰林衙門原以儲養人材嫻習文學以備顧

問編纂之用必淹貫經史博極羣書方克諳練體裁洞
晰今古敷詞命意典瞻宏通悉登著作之林用佐右文
之治始為稱職今將翰林各官特行考試朕親加詳閱
分別次第以示勸懲徐乾學韓荃孫岳頌歸允肅喬萊
學問優長文章古雅宜加獎勵作何賞賚著議奏彭孫
適等文學亦通著照舊供職益勤研究以底精純周之
麟崔如岳龐塏錢中諧顏光猷李元振費之達李復泌
劉果實劉芳喆文理荒疎未嫻體式難勝厥任除李元

振劉芳詰已經降調其餘俱著對品調用爾部即遵諭
行特諭康熙二十四年二月初七日

諭大學士勒德洪明珠

驍騎校伊番等於三月初旬令馳驛由內路直往黑龍
江可傳諭兵部康熙二十四年二月十三日

聖祖仁皇帝御製文第二集卷一

欽定四庫全書薈要

聖祖仁皇帝御製文第二集卷二目錄

勅諭

諭大學士明珠

諭大學士勒德洪明珠王熙吳正治宋德宜學
士麻爾圖圖納席爾達丹岱禪布吳興祖王
起元

諭大學士勒德洪明珠王熙吳正治宋德宜學

士麻爾圖席爾達吳興祖王起元

諭大學士勒德洪明珠王熙吳正治宋德宜學

士麻爾圖圖納席爾達丹岱禪布吳興祖王

起元

諭大學士勒德洪明珠

諭大學士勒德洪明珠王熙吳正治宋德宜學

士麻爾圖圖納牛鈕丹岱禪布吳興祖王起

元徐乾學韓葵

諭戶部

諭大學士明珠

諭大學士勒德洪王熙吳正治宋德宜學士麻爾圖圖納席爾達牛鈕丹岱禪布吳興祖王起元徐乾學韓爌

諭大學士勒德洪明珠

諭大學士勒德洪學士麻爾圖圖納

諭侍郎佛倫學士圖納席爾達牛鈕

諭侍郎佛倫學士圖納席爾達牛鈕

諭大學士勒德洪明珠學士麻爾圖圖納牛鈕
丹岱禪布吳興祖王起元

諭大學士勒德洪明珠王熙吳正治宋德宜學
士麻爾圖圖納牛鈕丹岱禪布吳興祖王起
元徐乾學韓爌

諭大學士勒德洪明珠王熙吳正治宋德宜學
士麻爾圖圖納牛鈕丹岱禪布吳興祖王起

元徐乾學韓莢

諭大學士勒德洪明珠王熙吳正治宋德宜學
士麻爾圖牛鈕禪布吳興祖王起元徐乾學
韓莢

諭大學士勒德洪明珠學士麻爾圖牛鈕禪布
諭大學士勒德洪明珠

諭大學士勒德洪明珠王熙吳正治宋德宜學
士麻爾圖牛鈕禪布穆成格吳興祖王起元

徐乾學韓茨

欽定四庫全書薈要卷一萬三千三十

集部

聖祖仁皇帝御製文第二集卷二

勅諭

諭大學士明珠

太祖實錄先以小本兼滿漢字迅速繕寫送進朕將恭覽焉若待白鹿紙謄真大本實錄同進則為時太遲矣
康熙二十四年二月十六日

諭大學士勒德洪明珠王熙吳正治宋德宜學士

麻爾圖圖納席爾達丹岱禪布吳興祖王起元
內閣翰林院須用通曉漢文善翻譯者其自卿員以下
部院無品級筆帖式以上及滿洲蒙古漢軍廢官與隨
旗行走暨閒散人曉習漢文能譯滿文者聚而精加考
試記其文學優長者用之其下所司速察以聞康熙二
十四年三月初四日

諭大學士勒德洪明珠王熙吳正治宋德宜學士
麻爾圖席爾達吳興祖王起元

議政所關殊為機密重要今見凡所議之事方經議訖即已宣露又滿洲蒙古都統本以人材勇健授為都統非以其練達事務而授之也都統中不克曉達事務者甚多諸若此者宜罷其議政其宜罷者具聞罷之至於兵事乃都統之專責仍照常預議爾等以此意降旨於議政諸臣焉康熙二十四年三月初五日

諭大學士勒德洪明珠王熙吳正治宋德宜學士麻爾圖圖納席爾達丹岱禪布吳興祖王起元

朕巡省南服見經過地方城垣圯壞者所在多有夫城垣者生民之保障所以衛吾人者也亟宜修築之其令地方官何以葺治下之工部部議取旨行焉康熙二十四年三月初六日

諭大學士勒德洪明珠

遣往俄羅斯之彼土六人各賞以衣帽鞞等物可傳諭理藩院康熙二十四年二月十七日

諭大學士勒德洪明珠王熙吳正治宋德宜學士

麻爾圖圖納牛鈕丹岱禪布吳興祖王起元徐
乾學韓茨

索倫達呼里總轄之任甚為要重必得賢能之人始能
管理今著理藩院撥什庫善馳馬者一人由驛遞速遣
至馬喇處馬喇身在彼土有賢能之人堪任索倫達呼
里總轄者馬喇以其名明白具疏即付遣往撥什庫齎
奏所遣撥什庫限往返在二十日之內可傳諭理藩院
康熙二十四年四月初七日

諭戶部

朕撫御方夏愛養黎元早作夜思勤求治理閭閻疾苦無時不深軫念欲使民生樂業比屋豐盈惟當已責蠲租萬姓得沾實惠直隸地方頻遇旱災小民匱乏宜加恩恤順永保河等處圈占地方應徵康熙二十一年地丁錢糧已經詔行蠲免所有直隸八府康熙二十三年未完地丁錢糧盡與豁免其順永保河未經圈占地方及真順廣大等處康熙二十四年應徵地丁各項正賦

俱著免三分之一爾部速行該地方官通行曉諭務使
人人得被膏澤以副朕勤恤民隱至意如有不肖有司
借端朦溷私行重徵者或經叅奏或被告發定行從重
治罪爾部即遵諭行特諭康熙二十四年四月初十日

諭大學士明珠

曩者每一夫田撤還一晌之田近日丈量各旗有察出
溢額之田今茲撥給何以不給此等田而以百姓開墾
之田四百頃撥給耶其令戶部堂官於十四日早至察

濫額之田現有若干及以百姓開墾之田因何撥給詢問明白同戶部堂官面奏特諭康熙二十四年四月十二日

諭大學士勒德洪王熙吳正治宋德宜學士麻爾圖圖納席爾達牛鈕丹岱禪布吳興祖王起元徐乾學韓爌

與魏一德同夥先經拿獲之犯已改為斬罪魏一德亦應改為斬此本著照前旨擬票簽送進嗣後凡如此等

先經拿獲應正法重犯有旨改減等者其續獲之犯亦
照前減等完結擬票簽進覽一案同夥之人當一體治
罪勿得前後互異爾等切記之康熙二十四年四月二
十九日

諭大學士勒德洪明珠

巴圖爾額爾克濟濃違離彼土嚮化而來宜加愛養經
理其居處迺彼等原為俄七爾圖汗所屬累世進貢誠
懇恪恭俄七爾圖汗之孫老卜臧滾布與巴圖爾額爾

克濟濃當使聚合一處於所宜居之地為之經理令其
居處賜之封號給以金印冊用昭示朕繼絕舉廢之至
意焉可遣賢能台吉與理藩院堂官侍衛曉諭巴圖爾
額爾克濟濃言以爾等搶奪毛明安及三烏喇特之故
本宜遣兵征剿悉行翦滅但念俄七爾圖汗累世進貢
誠懇恪恭特加矜憫爾等罪戾盡皆寬宥老卜臧滾布
乃俄七爾圖汗之孫爾等皆屬一國為親近兄弟今令
爾等皆與老卜臧滾布等聚合封以名號與老卜臧滾

布等可以同居之善地相度定居遣使於達賴喇嘛以
如此措置頒朕諭旨其宜居之地亦與老卜臧滾布巴
圖爾額爾克濟濃等公同相視令所遣台吉等還奏此
事於今年八月即宜舉行爾等與議政王貝勒大臣蒙
古大臣會同詳議以聞康熙二十四年五月二十四日
諭大學士勒德洪學士麻爾圖圖納

俄羅斯闖入我邊塞擾害俄羅斯春索倫黑真費雅喀等
處人民搶掠其家口雖屢肆兇暴朕不忍遽興兵革故

未即遣發大兵征討數遣使曉諭俄羅斯恃其遼遠仍復抗拒益侵犯我邊鄙之人肆逆不止用是遣大兵直抵雅克薩之城彼因困迫已甚而後歸降爰遵朕命宥其困而後降之罪釋之使還大兵迅速征行破四十年盤踞之俄羅斯於數日之間獲雅克薩之城克奏厥績薩布蘇向來逗畱不進兵之罪應概從寬免又雅齊納鄂山本獲罪發遣之人其所互告之事仍行察議今進剿官兵殊屬勞苦令伊等暫回烏喇幾林地方於盛京

達呼里之兵酌量派往防守至於雅克薩城雖已克取
防禦決不可疎應於何地永駐官兵彈壓此時即當定
議著大學士勒德洪學士麻爾圖圖納同郎談關係與
議政王貝勒大臣會議具奏康熙二十四年六月十四
日

諭侍郎佛倫學士圖納席爾達牛鈕

錢糧所關甚重宜詳加釐剔以除虛冒濫支之弊近見
上駟院以假印誑領太常寺亦以假印取絲現今發覺

者雖止此其未發覺者謂之無有可乎此皆支給時不行詳察怠玩疎虞之所致也嗣後凡關係支用錢糧事務必告之該部院堂官稽核得實用印文支取其四五十兩以下者遣筆帖式往領若踰此數則遣司官往領其給與時亦詳加稽核告之該部院堂官然後與之可也如此於職事亦無所曠廢告於該堂官及司員親往領取亦豈難行之事爾等可傳諭戶部凡內外支用錢糧不致虛冒朦混稽遲其詳議定例以聞康熙二十四

年六月二十八日

諭侍郎佛倫學士圖納席爾達牛鈕

江西庫鎮堡泰和萬安黃泖鐵山碣西邨石頭碣等處
所殺敗者俱係小寇將此俱從優敘為頭等二等軍功
則雲南黃草壩等處之大奮剿殺者又將以何等敘次
之耶所議皆屬太過若本章盡行折出又致一番奏請
事覺繁多此等議准之四十五疏咸發還兵部另議以
聞不准議敘之二十二疏且留覽康熙二十四年八月

初九日

諭大學士勒德洪明珠學士麻爾圖圖納牛鈕丹
岱禪布吳興祖王起元

朕近觀牌樓原基甚深若將街衢掘至原基兩傍房屋
皆在浮土之上難以久存而於觀瞻亦不相稱且所掘
之土運於何處也至濬治護城河若積土城下遇雨水
流入河內旋至淤塞在鑿河掘基需用帑金尚屬小事
但慮興作無益應何法挑掘何方貯土爾等會同八旗

都統副都統該部及各部院大臣步軍統領詳閱街衢
議奏康熙二十四年九月二十一日

諭大學士勒德洪明珠王熙吳正治宋德宜學士
麻爾圖圖納牛鈕丹岱禪布吳興祖王起元徐
乾學韓爌

監察御史錢珏題叅巡撫穆爾賽加徵火耗甚重一案
令內閣九卿詹事科道官員持正詳議備列公論具奏
內閣九卿官員以穆爾賽為人樸實不生事端奏聞穆

爾賽居官不善朕所聞甚明故命原叅錢珏明白指實
具奏今錢珏將加徵火耗甚重竝受禮物欸項已經指
陳凡事令九卿官員會議原期公正得實今所議穆爾
賽事朕意以為不公夫諸臣不從公詳議如此徇庇具
議嗣後九卿諸臣何以倚任事務何以得理即如溫代
達爾布等最為大貪大惡之流朕特加懲治發往黑龍
江前問九卿官員以穆爾賽為人樸實不生事端係誰
所議尚書科爾坤奏稱係陳廷敬蔣宏道之言及問陳

廷敬等皆奏稱臣等不曾如此說原說平常且朕又聞此事初議時原有穆爾賽無有劣蹟之語後散訖內閣復追回九卿欲將無有劣蹟之語刪去尚書科爾坤說若將此語刪去我不肯與議遂未完竟而去首先立議穆爾賽為人樸實不生事端者即係庇護穆爾賽之人何官輒敢專擅殺人何官輒敢專擅救人此事斷不可仍前但稱係臣等公議務須各陳所見著隨朕行在之尚書都御史侍郎學士等往聽之康熙二十四年九月

二十一

諭大學士勒德洪明珠王熙吳正治宋德宜學士
麻爾圖圖納牛鈕丹岱禪布吳興祖王起元徐
乾學韓菼

九卿詹事科道令其會議會推本期至公至正務得真
實今聞九卿會議之事間或不據實具議草率苟且因
循而行有此一次立議爭勝以冀下次不與相拂而從
之者或有此一次將彼意中之人薦出冀下次將其親

朋薦出以相報者或有薦其門生者有薦其同年者有
薦其同鄉戚友者夫九卿會議會推理宜虛公持論豈
可一二人專擅以行且設立科道本欲其凡事從實建
言有執拗護庇者即為指叅也其專擅執拗護庇之人
何未見糾劾耶衆議之時亦有一同具議後因其事不
當復云彼時我原如此說者如果原議時衆論與伊意
不合即宜將己見明白敷陳另立一議既不另立一議
同列職名又稱我曾如此說是斷斷不可者且今誰可

以擅處誰耶即如張志棟近將九卿題叅亦誰如彼何也朕於康熙十八年亦因此等事曾經有旨申飭可察前旨一併復行傳諭凡事會議不必詢問本省大臣官員若每加詢問或致不肖之人益在地方生事橫行本省督撫地方官無不畏懼且將凡屬會議之事無不囑託本省大臣官員矣政務何由得平今會議山西巡撫穆爾賽因係滿洲恐致敗露意欲從平易歸結耳若是何不於事前豫為勸戒令其公廉乃不為豫戒徒於事

發之後欲如此結案可乎爾等齊集滿漢九卿大臣傳諭申飭之康熙二十四年九月二十三日

諭大學士勒德洪明珠王熙吳正治宋德宜學士麻爾圖牛鈕禪布吳興祖王起元徐乾學韓葦凡可一次會題完結之事嗣後不必兩三次具題於應會同之部院即會議結案奏聞如有仍違誤具題者爾等即隨簽以進康熙二十四年九月三十日

諭大學士勒德洪明珠學士麻爾圖牛鈕禪布

傳諭厄魯特爾等進貢來使沿途往返擾害民生搶掠
牲畜以致邊境內外百姓患苦者甚衆朕雖稔知以爾
等遠方之人本不諳中國法紀無知妄行屢不加罪概
從寬免嗣後貢使往來如有攘奪為非者爾等率領頭
目并犯法之人皆依中國律令治罪曾經頒旨曉諭今
爾進貢頭目并不嚴束儼從任其擾害將內地人毆死
千紀甚矣先以爾等愚昧頑蠢凡細微奪攘之罪知而
宥之乃屢邀寬免頻加曉諭全不欽遵竟至毆死內地

之人今若不按法抵罪日後漸益恣肆大起爭鬪未可
定也用是將毆死人命之伊忒木根依律處斬令爾等
識之觀之此後爾等其謹遵成法嚴戢從人毋得肆惡
妄行特諭康熙二十四年十月十一日

諭大學士勒德洪明珠

今見外藩蒙古王貝勒貝子公台吉等有因徵收年貢
羊酒借端多派殊屬累民可酌量大加裁減歸於至約
令其進獻該部會同確議具奏康熙二十四年十月十

六日

諭大學士勒德洪明珠王熙吳正治宋德宜學士
麻爾圖牛鈕禪布穆成格吳興祖王起元徐乾
學韓莢

近見工部凡於交送物件皆耽延時日抑勒不收弊端
滋多此後其嚴禁之可傳諭工部康熙二十四年十月
二十三日

聖祖仁皇帝御製文第二集卷二

欽定四庫全書薈要

聖祖仁皇帝御製文第二集卷三目錄

勅諭

諭戶部

諭大學士明珠

諭內閣

諭大學士勒德洪明珠王熙吳正治宋德宜學

士麻爾圖牛鈕禪布吳興祖王起元徐乾學

韓炎

諭大學士勒德洪明珠王熙吳正治宋德宜學
士麻爾圖牛鈕禪布吳興祖王起元徐乾學
韓炎

諭大學士勒德洪學士麻爾圖

諭戶部

諭政治典訓總裁大學士勒德洪明珠王熙吳
正治宋德宜戶部尚書余國柱左都御史陳

廷敬

諭吏兵二部

諭禮部

諭大學士勒德洪明珠王熙吳正治宋德宜學士吳興祖王起元徐乾學韓莢

諭刑部等衙門

諭吏部

諭吏兵二部

諭禮部翰林院

諭吏部

諭吏部

諭內閣

諭刑部

諭大學士勒德洪明珠王熙吳正治宋德宜學

士麻爾圖牛鈕禪布蔡必漢噶思泰

欽定四庫全書薈要卷一萬三千三十一

集部

聖祖仁皇帝御製文第二集卷三

勅諭

諭戶部

朕惟自古帝王統一寰區懋先德化必子惠黎元勤求
民瘼俾幹止寧成家給人足而後世躋雍熙治登上理
朕御極以來宵旰圖治未敢即安念切民依思培邦本
雖編氓漸得遂生而閭閻正資惠養欲使羣生樂利比

戶豐盈惟頻行減賦蠲租庶萬姓得沾實惠前此用兵以來河南湖北兩省民人轉輸供億勞費繁多特沛仁恩以昭軫恤所有康熙二十五年應徵地丁各項錢糧著與蠲免一半其康熙二十四年未完地丁錢糧亦著盡與豁免又直隸獻縣河間縣河間衛江南宿遷縣興化縣邳州高郵州鹽城縣山東郯城縣魚臺縣地方今年重罹水災小民艱苦亦應加恩軫恤所有康熙二十四年下半年二十五年上半年地丁各項錢糧俱與豁免

免爾部速行該地方官通行曉諭務使人人均被恩膏
以副朕愛育蒼生至意如有不肖有司官役借端朦混
及私行重征者該督撫指名題叅從重治罪如該督撫
徇隱不行糾舉或經叅奏或被告發定行一併從重治
罪爾部即遵諭行特諭康熙二十四年十一月初四日
諭大學士明珠

王等皆用紫韁乘騎或以紫韁濫給微賤之人乘用又
其甚者遂至給與外省官員商賈等輩不待敝壞而更

新騎用者至多大悖儀典良由未經定例以至於王
等既束用金黃帶若騎用金黃韁則不得妄給微賤而
等威辨矣其下宗人府禮部會同定例議奏康熙二十
四年十一月十八日

諭內閣

觀所賞琉球等外國恩賚之物甚非於厚往薄來之道
尚未允協爾衙門會同禮部察頒錫外國之例酌量增
益所賞儀物確議以聞康熙二十四年十一月二十日

諭大學士勒德洪明珠王熙吳正治宋德宜學士
麻爾圖牛鈕禪布吳興祖王起元徐乾學韓莢
嗣後凡擬上傳諭旨如遐方底定海宇昇平等誇大言
詞毋得撰寫康熙二十四年十一月二十九日

諭大學士勒德洪明珠王熙吳正治宋德宜學士
麻爾圖牛鈕禪布吳興祖王起元徐乾學韓莢
今月朔日食十六日月食且比日積陰無雪朕思天象
稍有愆違即當儆戒修省或施行政事有未當歟或下

有冤抑未得伸歟爾等傳諭九卿詹事科道詳議以聞
康熙二十四年十一月二十九日

諭大學士勒德洪學士麻爾圖

日者大兵往征俄羅斯破雅克薩城釋俄羅斯不誅赦
之使生還其時不竝取泥卜楚地者蓋以泥卜楚地畫
為疆索使俄羅斯不得越泥卜楚界外聽其捕牲也
今薩布蘇等奏言俄羅斯復來城雅克薩地今當即往
征而滅之耶抑或緩之以待黑龍江墨爾根地將士移

家定然後進兵為宜耶令議政王貝勒大臣及與俄羅
斯之役彭春佟保班達爾善郎談同爾等會議以聞康
熙二十五年正月十九日

諭戶部

國家設關權稅原以阜財利用恤商裕民必征輸無弊
出入有經庶百物流通民生饒給近來各關差官不恪
遵定例任意徵收官役通同恣行苛虐托言辦銅價值
浮多四季解冊需費將商人親填部冊改換塗飾既已

充肥私橐更圖溢額議敘重困商民無裨國計種種情
弊莫可究詰朕思商民皆吾赤子何忍使之苦累今欲
除害去弊正須易轍改絃所有現行例收稅溢額即陞
加級紀錄應行停止其採辦銅餉定價既已不敷作何
酌議增加其四季達部冊籍應俟差滿一次彙報嗣後
務令各差潔己奉公實心釐剔以副朕體下恤商至意
如或仍前濫征侵隱藐玩不悛作何加等治罪至銅價
既議加給稅額應否量增俱著九卿詹事科道詳議具

奏特諭康熙二十五年二月十四日

諭政治典訓總裁大學士勒德洪明珠王熙吳正
治宋德宜戶部尚書余國柱左都御史陳廷敬
朕續承丕基孜孜圖治宵旰兢業二十五年於茲賴
天之靈

宗廟之福蠢爾小醜以次削平眷念吾民雖甫休息而
閭井未盡安樂風俗未臻淳古永惟治忽所繫實在朕
躬日不遑寧勤求至道行一政惟恐或戾舊章發一言

惟恐未孚衆志朕心乾惕常用歉然乃臣僚援古時政
日厯及前朝寶訓體例請將歷年政令編輯成書朕未
之許在廷諸臣合詞奏懇至再因思古之帝王建極陳
常言期可法行期可則裒其政事著為一編用以式訓
臣民昭茲來許厥有故事方策具存茲特允所請定名
曰政治典訓命卿為總裁官其董率在館諸臣恪勤乃
事以時綴錄惟質毋飾惟核毋浮豈徒云徵諸庶民質
諸百世朕夙寢晨興思艱圖易萬幾在御日慎一日藉

用自考以比古者省歲之意庶幾茂登上理久道化成
卿其勉之欽哉康熙二十五年二月二十二日

諭吏兵二部

我國家埽除逆孽平定遐荒即負山阻箐之苗民咸輸
誠而供賦封疆大吏自宜宣布德義動其畏懷俾習俗
漸馴無相侵害庶治化孚於遠邇近雲貴廣西四川湖
廣等處地方督撫提鎮各官不惟不善加撫綏更爾恣
行苛虐利其土產珍奇貨藏饒裕輒圖入己悉索未遂

因之啓釁職為厲階蠢爾有苗激成抗拒即擅殺一二
誑稱累百盈千始贖貨以生端既邀功而逞志藐玩因
循殊負委任朕思土司苗蠻授官輸賦悉歸王化有何
桎杻互相格鬪無有寧居嗣後作何立法務令該地方
督撫提鎮等官洗心易慮痛改前轍推示誠信化導安
輯各循土俗樂業遂生亦令苗民恪遵約束不致侵擾
內地居民以副朕撫馭遐方至意著九卿詹事科道會
同逐一詳議具奏特諭康熙二十五年二月二十三日

諭禮部

自古帝王懋建元良務先豫教所以漸摩性習陶淑中
和正大本而貞萬邦所關甚重朕於宮中諭教皇太子
諄諄以典學時敏勤加提命日習經書朕務令背誦復
親為講解夙興宵寐未嘗間輟今皇太子於四書尚書
略能成誦亦粗覆講但思大法大經古訓甚備制心制
事義蘊無窮必益加以研究討論就將罔懈庶幾德業
馴至大成今文華殿工已經告竣所有出閣應行典禮

爾部會同詹事府詳察確議擇吉具儀來奏特諭康熙
二十五年二月二十七日

諭大學士勒德洪明珠王熙吳正治宋德宜學士
吳興祖王起元徐乾學韓爌

各省晴雨不必繕寫黃冊特本具奏乘奏事之便寫細
字摺子附於疏內以聞其下禮部康熙二十五年三月
初三日

諭刑部等衙門

刑法者專以禁戢兇暴若豪強奸慝固難姑宥其貧賤愚昧者略施寬貸亦未嘗不可耳康熙二十五年三月十六日

諭吏部

自古帝王諭教太子必簡和平謹恪之臣統領官僚專資贊導江寧巡撫湯斌在講筵時素行勤慎朕所稔知及簡任巡撫以來潔己率屬實心任事允宜拔擢大用風示有位特授為禮部尚書管詹事府事現任詹事郭

茶少詹盧琦歸允肅著照舊留任詹事朱瑪泰著對品
調用少詹喇巴色度著解任照伊原品隨旗上朝爾部
即遵諭行特諭康熙二十五年三月二十日

諭吏兵二部

封疆文武大吏當用兵征剿時固在智勇兼優亦重清
廉律已原任鑾儀衛鑾儀使趙良棟前值逆賊盤踞漢
中首先倡率入川於漢中成都等處効力勦賊勞績昭
著復領兵直抵雲南攻克省城之後獨能恪守法紀廉

潔自持深為可嘉今以衰老解任著復其勇略將軍兵部尚書兼都察院右副都御史總督原銜以示眷注之意爾二部即遵諭行特諭康熙二十五年四月初六日

諭禮部翰林院

自古帝王致治隆文典籍具備猶必博採遺書用充祕府蓋以廣見聞而資掌故甚盛事也朕畱心藝文晨夕披覽雖內府書籍篇目粗陳而裒集未備因思通都大邑應有藏編野乘名山豈無善本今宜廣為訪輯凡經

史子集除尋常刻本其有藏書祕錄作何給值採集及
借本抄寫事宜爾部院會同詳議具奏務令搜羅罔佚
以副朕稽古崇文之至意特諭康熙二十五年四月初
十日

諭吏部

殫心効職者臣子之常經晉爵酬庸者朝廷之大典茲
太祖高皇帝實錄告成克昭一代之典章永垂萬世之
模範其監修總裁等官著有勤勞宜加寵錫監修總裁

官禮部尚書武英殿大學士覺羅勒德洪著加太子太傅總裁官太子太傅禮部尚書武英殿大學士加一級明珠著加太子太師禮部尚書保和殿大學士加三級王熙禮部尚書武英殿大學士加一級吳正治吏部尚書文華殿大學士加一級宋德宜俱著加太子太傅爾部即遵諭行特諭康熙二十五年四月十八日

諭吏部

國家選用臣工必得才學通敏之人畀以職任斯能庶

官無曠實得用人之益朕見漢軍官員起家多由捐納從事學問者少年未成材便涉仕版並無素抱何以蒞事臨民去年特行考試分別去留又將交白卷人員從寬姑免處分令其學習俟通曉文義該部題明考試錄用朕因從前考較情弊多端今特行親試荒陋不堪者甚衆朕不加搜索私藏懷挾自行發露者已交刑部拿問外其考列一等高璜等及二三四等人員現任者仍舊供職候補者照常補用王撫民等文理不通及書寫

履歷投交白卷者俱著以原品隨旗行走其去年著令
學習之人今仍交白卷及考置五等者顯圖僥倖著察
議具奏王樑居官有聲仍准候補難蔭生馬世永王琨
王鎬胡枚念伊父盡節可憫馬世永等著令學習候補
曉文義之日該部題請錄用胡枚交與該管衙門另行
請旨程萬坦曾効力行間著以旗內武職補用爾部即
遵諭行特諭康熙二十五年四月二十三日

諭內閣

人君豫教太子令出閣讀書原期於朝夕無間洞徹書史實有益於身心實有裨於治道本不在繁文縟節也儻徒事虛文日習威儀奚暇究心實學況情之最親者莫如父子父子主恩出自天性禮節繁多則父子之間反或踈遠歷觀前代往往有之至若明季東宮出閣每另設官屬旅進旅退無非具文竝未篤志黽勉以求實學遂令太子不能通貫經史以致庸闇諸臣且因便乘間欺隱蒙蔽肆其詭譎離間父子止圖自利身家此皆

專務虛文不求實學之故積弊多端不可勝言朕思東
宮官屬總屬朝廷臣子寧有異耶即如歲時令節百官
另進太子箋文等禮亦皆沿襲舊例以進箋及諸王大
臣行禮為要務而於研究經史修治身心之道致有曠
悞曾何裨益我朝令太子出閣讀書乃初次舉行當垂
示永久遵循勿替關係最為鉅要且皇太子宫殿尚未
營建諸王大臣於何處行禮禮部所奏之疏爾等其詳
議以聞康熙二十五年閏四月初六日

諭刑部


獄訟重情關係民命當讞鞫時雖經詳慎始定爰書今值天氣炎熱其中恐有情可末減者久繫囹圄或致瘐斃朕心不忍茲特遣科爾坤阿蘭泰董訥馬世濟等會同三法司將已結重案逐一詳加審鞫如有情可矜疑者即與察明事由開列具奏務期情法允協不致淹滯斃獄以副朕順時好生至意特諭康熙二十五年閏四月十八日

諭大學士勒德洪明珠王熙吳正治宋德宜學士
麻爾圖牛鈕禪布蔡必漢噶思泰

朕聞鳳陽徐州等處地方亢旱人民困苦學士麻爾圖
率戶部賢能司官一人馳驛速往詳明據實躡看果民
食維艱窘於生計速發鳳陽倉銀米一面賑濟一面奏
聞其賑給事宜麻爾圖會同戶部議以聞康熙二十五
年閏四月二十二日



聖祖仁皇帝御製文第二集卷三



總校官庶吉士臣侍朝

校對官檢討臣郭寅

謄錄監生臣陳熙

欽定四庫全書薈要

集部

聖祖仁皇帝御製文二集卷六

四王

詳校官原任編修臣徐立綱

欽定四庫全書薈要

聖祖仁皇帝御製文第二集卷四目錄

勅諭

諭三法司衙門

諭一統志館總裁勒德洪等

諭三法司衙門

諭大學士勒德洪明珠吳正治宋德宜學士禪
布蔡必漢噶思泰吳興祖徐廷璽韓莢郭榮



諭工部右侍郎孫在豐

諭刑部

諭大學士勒德洪明珠王熙吳正治宋德宜學

士禪布蔡必漢吳興祖徐廷璽李光地韓莢

郭棻

諭荷蘭國王耀漢連氏甘勃氏

諭大學士勒德洪明珠王熙吳正治宋德宜學

士禪布蔡必漢噶思泰吳喇岱吳興祖徐廷

璽李光地韓莢郭棻

諭內閣

諭戶部

諭大學士勒德洪明珠王熙吳正治宋德宜學
士禪布蔡必漢噶思泰吳喇岱齊穡吳興祖
徐廷璽李光地韓莢郭棻

諭大學士勒德洪明珠王熙吳正治宋德宜學
士禪布蔡必漢噶思泰吳喇岱齊穡吳興祖

徐廷璽李光地韓奕郭棻

諭大學士明珠

諭禮部

諭戶部

諭大學士勒德洪明珠學士禪布噶思泰吳喇
岱齊穡吳興祖額爾赫圖

諭大學士勒德洪明珠學士禪布噶思泰吳喇
岱齊穡額爾赫圖

諭大學士勒德洪明珠學士禪布噶思泰吳喇
岱額爾赫圖吳興祖徐廷璽

諭大學士勒德洪明珠學士禪布吳喇岱額爾
赫圖吳興祖徐廷璽

欽定四庫全書薈要卷一萬三千三十二集部

聖祖仁皇帝御製文第二集卷四

勅諭

諭三法司衙門

朕惟自古帝王撫御羣臣百姓政教修明治化洽暢與其繩以刑罰使人怵惕文網苟幸無罪不如感以德意俾民蒸蒸向善不忍為非書稱協和萬邦黎民於變時雍又稱臨下以簡御衆以寬唐虞盛時從欲風動其效

章章如是朕嘗心慕隆古力行教化冀以感發天良偕之蕩平正直之道而人情囂偽風俗頽敝明罰勅法國憲不可以已雖嘗屢行矜恤絕去煩苛終思尚德緩刑迺為至治之極軌自康熙元年以來中外臣民習染澆風爭事詐偽公行賄賂貪冒營求因緣請托作奸犯科頑鈍者恬弗知恥奸黠者愍不畏法以致是非乖謬綱紀廢弛朕親政以後洞悉奸弊加意釐剔振飭憲章務使軌律干紀之衆莫能匿慝法無旁貸人無遁情庶幾

禁遏頑豪杜塞僥倖近見罹於罪咎者漸覺減少但革
面未能革心畏罪不如知恥原夫立法之意本欲使人
難犯今因法令嚴密輒思苟免苟免之心切則彌縫之
弊深羣心日夕恐懼不寧巧偽滋多亦未可定今欲崇
尚德化務存惇大蕩滌邪穢一切令之自新除前經審
擬完結各案及關係宮殿陵寢河道工程侵欺正項錢
糧不議外內外現經發覺一應枉法得贓行賄與受人
員仍革職止免擬重辟照例定罪追贓其此等未經發

覺者悉與寬免有以諭前事參奏訐告者一槩不准自
諭以後中外臣民須洗心易慮省改前非守法奉公敦
厲廉恥以副朕使人寡過之至意再有干犯自難曲宥
至於旗下閒散官員人等及民間豪惡黨類竝無職任
乃攬說公事交結衙門妄行訛詐賄囑關通實繁有徒
朕皆稔悉嗣後益當恪遵法紀勿蹈故轍如怙終不悛
發覺之時從重治罪決不寬貸爾法司即通飭内外大
小各衙門八旗及內府佐領曉諭知悉一體遵行特諭

康熙二十五年五月初一日

諭一統志館總裁勒德洪等

朕惟古帝王宅中圖治總攬萬方因天文以紀星野因地利以兆疆域因人官物曲以修政教故禹貢五服職方九州紀於典書千載可覩朕纘紹丕基撫茲方夏恢我土宇達於遐方惟是疆域錯紛幅員遼闊萬里之遠念切堂階其間風氣羣分民情類別不有綴錄何以周知顧由漢以來方輿地理作者頗多詳略既殊今昔互

異爰勅所司肇開館局網羅文獻質訂圖經將薈萃成
書以著一代之鉅典名曰大清一統志特命卿為總裁
官其董率纂修官恪勤乃事務求采蒐閱博體例精詳
阨塞山川風土人物指掌可治畫地成圖萬幾之餘朕
將親覽且俾奕世子孫披牒而慎維屏之寄式版而念
小人之依以永我國家無疆之厯服有攸賴焉卿其勉
之欽哉康熙二十五年五月初七日

諭三法司衙門

近因天氣炎熱特遣部院大臣會同三法司詳加審鞠
將罪犯已經減等發落其直隸各省問刑衙門罪犯雖
經詳慎始定爰書但內外原屬一體有情可矜疑者亦
未可定著各直省督撫將已結案內現在監禁者逐一
詳加審理果可矜疑開明具奏爾三法司覆加詳核照
例減等以副朕慎刑愛民至意特諭康熙二十五年六
月初七日

諭大學士勒德洪明珠吳正治宋德宜學士禪布

蔡必漢噶思泰吳興祖徐廷璽韓莢郭蔡

各省輿圖載入一統志事殊重要或一省有大圖而無小圖或一省有里數程途而無疆界或一省有疆界而無里數程途各省皆不一例何也可詢之曾為總督巡撫者康熙二十五年六月十二日

諭工部右侍郎孫在豐

朕前因巡幸爰至江南見高寶興鹽山江泰等處積水汪洋民罹昏墊朕甚憫之應行開濬下河疏通海口俾

水有所歸民間始得耕種特發帑金拯救七邑災民屢
集廷議兼詢輿情允協僉謀事當釐舉茲命爾前往淮
揚所屬下河一帶車路等河并串場河白駒丁溪草堰
場等口挑濬事務專屬於爾監修爾宜往來親歷多方
經畫講求源流脈絡次第興工督率帶去司官等務實
心任事毋得怠忽擾害其司道府廳州縣等官如有違
玩貽誤及勢豪紳衿妄行干預包攬生事阻撓工程者
指名叅奏濬過工程丈尺用過夫料數目造冊畫圖貼

說具奏爾受茲專委須竭忠盡力悉心區處速竣大工
使海口疏通水消田墾蒸黎復業以副朕救民至意如
因循怠忽虛費財力責有所歸爾其慎之故勅康熙二
十五年七月初四日

諭刑部

刑獄民命攸關聽斷雖貴精詳而案牘務無留滯庶事
得速竣民免株累向來凡朔一二日及齋戒等期不理
刑名爾衙門一切奏章俱行停止因而案件間有停積

恐聽審人犯久候拖累覆核案件遷延滋弊嗣後遇前
項日期除循例不行刑外其餘照常章疏事件仍行審
理啓奏務期獄無稽緩案得早清以副朕明慎用刑之
至意特諭康熙二十五年七月二十三日

諭大學士勒德洪明珠王熙吳正治宋德宜學士
禪布蔡必漢吳興祖徐廷璽李光地韓爌郭蔡

每月朔初二日及凡齋戒日刑部所上常事照常發科
刑戮重罪事關人命者勿發可併數日章疏齋戒畢發

之或留中或發之內閣者皆如之康熙二十五年七月二十三日

諭荷蘭國王耀漢連氏甘勃氏

朕惟柔遠能邇盛代之嘉謨修職獻琛藩臣之大節輸誠匪懈寵賚宜頒爾荷蘭國王耀漢連氏甘勃氏屬在遐方克抒丹悃遣使齎表納貢忠藎之忱良可嘉尚用是降勅獎諭并賜王文綺白金等物王其祇承益勵忠貞以副朕眷欽哉故勅康熙二十五年七月二十七日

諭大學士勒德洪明珠王熙吳正治宋德宜學士
禪布蔡必漢噶思泰吳喇岱吳興祖徐廷璽李
光地韓莢郭榮

各省駐防人員有授世職者令其來京道路遼遠生產
苦於遷移此後不必令其來京官則令其仍留原任撥
什庫兵丁則以品職相稱之官弁及驍騎校缺用之康
熙二十五年八月二十六日

諭內閣

遣兵防戍所繫最要兵部堂官可速往會同盛京將軍
副都統今所議防戍可行與否詳議以聞康熙二十五
年九月初九日

諭戶部

自古帝王撫馭九有軫念民依凡鞠謀生養為計甚周
猶以賜復蠲租為布德行仁之要務朕嘉與海內元元
共圖樂利弛征減賦時厯於懷惟頻渙恩施俾萬姓得
沾實惠念直隸畿輔重地天下根本寬租之詔屢沛往

年但順永保河較之畿南諸府差役倍多供億尤劇應
加軫恤又湖廣湖南福建四川貴州地方昔年為賊竊
踞民遭苦累今雖獲有寧宇更宜培養以厚民生應一
體蠲免用昭愷澤直隸順永保河四府及四川貴州兩
省所有康熙二十六年應徵地丁各項錢糧俱著蠲免
二十五年未完錢糧亦著悉與豁免湖廣湖南福建兩
省所有康熙二十六年下半年二十七年上半年地丁
各項錢糧及二十五年未完錢糧亦與盡行豁免爾部

速行該地方通行曉諭務使人民均被恩膏以副朕愛育蒼生至意如有不肖有司官役借端朦混及私行重徵者該督撫指名題叅從重治罪如該督撫徇隱不行糾舉或經叅奏或被告發定行一併從重治罪爾部即遵諭行特諭康熙二十五年九月初九日

諭大學士勒德洪明珠王熙吳正治宋德宜學士
禪布蔡必漢噶思泰吳喇岱齊穡吳興祖徐廷璽李光地韓莢郭榮

錦州鳳凰城等地方人民稀少頗有曠土可令如墨爾根黑龍江耕種之例為之其下所司康熙二十五年九月二十四日

諭大學士勒德洪明珠王熙吳正治宋德宜學士
禪布蔡必漢噶思泰吳喇岱齊穡吳興祖徐廷璽李光地韓莢郭榮

逃人刺面所以禁逃也而捕逃緝獲者事仍如故且刺面之逃人贖身為民者亦有之此後逃人其主有願免

其刺字者宜聽其免刺九卿詹事科道於會集之便議
以聞康熙二十五年十月初二日

諭大學士明珠

諭俄羅斯察罕汗勅書中情事前命曉諭其使茲曉諭
時以勅書橐曉諭之若授勅書時則跪受之禮宜令其
知之康熙二十五年十月初六日

諭禮部

朕惟敬

天奉

祖郊祀廟饗必精白厥心竭誠致慎庶幾有孚昭格用
洽明禋朕於祭祀

壇

廟每躬詣行禮未嘗不齋明被濯實圖感通凡從事於
祀典者皆宜表裏精誠虔盡職掌近見執事陪祀各官
間有因循怠忽視為具文不能盡志致慙共效昭事之
忱殊為非禮嗣後務俾各秉誠心克恭祀事凡行禮儀

節始終整肅毋得慢易用副朕敬奉

天

祖至意作何再加通飭永可遵行著九卿詹事科道會同詳加確議具奏特諭康熙二十五年十一月十六日

諭戶部

朕惟自古帝王撫馭寰區勤宣德意必軫恤民隱加惠閭閻俾黎元樂業比戶豐盈而後化協時雍治登隆理朕念切民依鞠謀生養欲使羣生樂利幹止寧成惟頻

行減賦蠲租庶萬姓得沾實惠前念直隸畿輔重地王
化所宜先大沛恩膏用培邦本而順永保河四府地方
人民較之畿南差役倍多煩苦故將康熙二十六年地
丁各項錢糧同湖南福建四川貴州四省錢糧盡與豁
免比慮兵餉或有不敷真順廣大四府地方未經一體
蠲免今聞此四府人民間有艱苦朕心深為軫念宜速
施渥澤均示仁恩著將此四府康熙二十六年地丁各
項錢糧盡行蠲免爾部速行地方官通行曉諭務使人

民均沾實惠以副朕愛育蒼生至意如有不肖有司官役借端朦混私行重徵者該撫指名題叅從重治罪如該撫徇隱不行糾舉或經叅奏或被告發定行一併從重治罪爾部即遵諭行特諭康熙二十五年十二月

諭大學士勒德洪明珠學士禪布噶思泰吳喇岱
齊穡吳興祖額爾赫圖

日者遣部員自幾林烏喇至黑龍江以蒙古席白達呼里索倫等人力畊種田穀大獲夫民食所關至重來歲

仍遣前種田官員以蒙古席白達呼里索倫等人力耕種郎中博奇所監種田地較諸處收穫為多足供驛站人役之口糧又積貯其餘穀博奇効力視衆為優其註之冊此遣去諸員可互易其地監視耕種博奇又復大獲則議叙焉康熙二十五年十二月初六日

諭大學士勒德洪明珠學士禪布噶思泰吳喇岱
齊穡額爾赫圖

聞有運盛京糧米於山海關內者又泛海販糶於山東

者多有之糧米所繫最為緊要況今防戍官軍人口衆多糧糈可適足不致缺乏耶未可必也宜止其販糶糧米其下所司密咨移盛京將軍副都統戶部侍郎以已意禁之康熙二十五年十二月初六日

諭大學士勒德洪明珠學士禪布噶思泰吳喇岱
額爾赫圖吳興祖徐廷璽

京師重地所關鴻鉅盜賊兇棍察緝宜嚴其在步兵尤為專責前步軍統領費揚古在任嚴於巡緝其所管轄

屏絕情面今現任步軍校席特庫亦於情面能為拒絕
巡緝管轄甚嚴若步軍統領總尉皆如席特庫盜賊兇
棍畏懼法網自當斂跡京師庶得肅清左翼總尉穆呼
達年老衰弱右翼總尉沙木布為人庸懦皆令解任二
等侍衛達漢泰其人堪用可任管轄其代沙木布為總
尉穆呼達缺選擇以聞俟此總尉之缺既補之後可令
步軍統領總尉等會同於現任步軍副尉步軍校等員
中察其不克任管轄庸劣者罷之其下兵部康熙二十

六年二月初二日

諭大學士勒德洪明珠學士禪布吳喇岱額爾赫
圖吳興祖徐廷璽

昨夜正陽門外失火漢官皆不事撲滅但袖手旁視今
八旗都統副都統五旗護軍統領向不預直宿可於要
地分班輪直若偶遇火即為撲滅僅有傳集之事亦易
齊聚方今時際昇平竝無効力之地分班直宿以盡勤
勞分所宜然令滿洲蒙古漢軍都統副都統五旗護軍

統領會議以聞康熙二十六年二月十二日

聖祖仁皇帝御製文第二集卷四

欽定四庫全書薈要

聖祖仁皇帝御製文第二集卷五目錄

勅諭

諭吏部

諭刑部

諭大學士勒德洪明珠

諭大學士明珠王熙宋德宜余國柱學士禪布
吳喇岱額爾赫圖色稜格舜拜吳興祖徐廷

璽盧琦

諭大學士勒德洪明珠王熙宋德宜余國柱學
士禪布額爾赫圖色稜格舜拜吳興祖徐廷
璽盧琦

諭大學士勒德洪明珠王熙宋德宜余國柱學
士禪布額爾赫圖色稜格舜拜吳興祖徐廷
璽盧琦

諭內閣

諭大學士勒德洪明珠

諭大學士勒德洪明珠

諭內閣

諭大學士明珠學士禪布額爾赫圖舜拜

諭尚書鄂爾圖郎中伊爾克圖溫保

諭八旗都統三品以上官

諭滿洲管漢軍副都統參領等

諭內閣

諭內閣

諭大學士勒德洪明珠學士齊穡額爾赫圖舜
拜多奇凱音布趙山

諭戶部

諭刑部

諭大學士明珠

諭大學士明珠

諭內閣等衙門

諭大學士勒德洪等

諭大學士勒德洪等

欽定四庫全書薈要卷一萬三千三十三

集部

聖祖仁皇帝御製文第二集卷五

勅諭

諭吏部

國家設官分職原以綏靖地方惠養黎庶督撫為封疆大吏表率屬員尤須才守兼優綽綽練政務方於吏治民生實有裨益巡撫于成龍自為縣令以至郡守素秉清操愛民盡職遂從臬司超擢巡撫簡任以來孤介自持

清廉益著釐奸剔弊扶弱鋤強境內謐寧旗民允服殊為可嘉從優特加太子少保以為廉能稱職者勸爾部即遵諭行特諭康熙二十六年四月十二日

諭刑部

時已入夏天氣亢暘雨澤尚爾愆期農事似有可慮或因刑名案件內無知罹法審擬失當情罪不符致干天和亦未可定茲特遣勒德洪余國柱達哈塔科爾坤王日藻徐廷璽等會同三法司將已結重案現在監禁

者逐一詳加審鞫如有罪可矜疑者即與查明事由開列具奏務期情法允協不致淹滯監斃以副朕欽恤刑獄感召休祥之至意特諭康熙二十六年四月十五日

諭大學士勒德洪明珠

汝等可傳旨於八旗滿洲蒙古都統等令於各旗中阿思哈尼哈番等官以下拖沙喇哈番等官以上或微末秩員又或初為部院官後襲父兄世職隸旗下者果有其人正直才具優長而敬謹小心為國勤勉素行端方

者一旗之中或三四人或一二人以其真知灼見保舉
奏聞引見於部院用之此保舉之人既用後與其所保
奏乖違不符者其保舉之都統副都統等連坐重罪之
必不姑恕如各旗無可舉之人則已或恐坐舉主心懷
畏懼隱其真正才賢不肯保奏甚無謂也可令各該旗
都統副都統於二十五日以所舉之人引見奏聞康熙
二十六年四月二十三日

諭大學士明珠王熙宋德宜余國柱學士禪布吳

喇岱額爾赫圖色稜格舜拜吳興祖徐廷璽盧琦

聽政之時科道侍班言官自恐失儀心切畏懼以致條奏者甚少凡啓奏官員果有失儀朕自降旨或其人自為檢舉科道侍班罷之誠是且科道官多起自疎遠進退周旋未經嫻習朕欲以其建言為要務雖有小過朕亦不計也其宣旨於九卿詹事科道此後科道侍班其已之康熙二十六年四月二十六日

諭大學士勒德洪明珠王熙宋德宜余國柱學士

禪布額爾赫圖色稜格舜拜吳興祖徐廷璽盧

琦

各項採買估計價值前浮冒欺飾者甚多是以數日令
其核減今所減者太過恐致苦累可令察訪時價量度
估計康熙二十六年五月初二日

諭大學士勒德洪明珠王熙宋德宜余國柱學士
禪布額爾赫圖色稜格舜拜吳興祖徐廷璽盧

琦

凡諸修造工程其估計在前今照新例銷算又今所定
例凡物料匠役工價核減太過至於苦累皆未可必前
此修造已完者其仍照原估計銷算凡各項物料所值
之價俱訪時價量度估計銷算康熙二十六年五月初
二日

諭內閣

八旗滿洲蒙古漢軍官員人等家僕開戶於旗分及佐

領竝民籍已為官者捐納候缺者捐納俊秀以上無論已補官未補官者令各旗都統副都統參領佐領等逐一嚴察明晰開送吏部吏部具聞請旨康熙二十六年五月初四日

諭大學士勒德洪明珠

雅克薩地官兵中烏喇寧古塔兵可還至愛渾城盛京兵可還至墨爾根地竝令屯駐息馬過冬其事宜議政王貝勒大臣會同詳議以聞康熙二十六年七月初六

日

諭大學士勒德洪明珠

黑龍江官兵口糧關係至重屢次轉運米數并黑龍江
墨爾根地方接續所種米數宜加察明自盛京等處廣
運米石以為久遠裨益之計此皆當周詳區畫又發遣
彼處游手無事之人甚多其口糧作何酌給邪前至黑
龍江一帶乃徑直通衢往來轉輸斷不致稍有阻滯如
蔡毓榮等巨富之人竝殷實之家槩予口糧殊覺未當

彼處漢軍皆著察出披甲當差游手無事之人可分設
官莊廣開田畝以為恒產令戶兵二部賢能司官迅往
逐一察明到日確議具奏康熙二十六年十月初一日

諭內閣

今年各省鄉試正副主考朕所未識者頗多止據本內
開列之人酌量點用今覽各省進呈題名錄內所出題
目未當者甚多如福建省試官所出第三場策內問臺
灣一段竝不知地方形勢事宜蒙昧出題悖謬已極此

外各省亦有未當者漢大學士學士等將各省呈覽題目及題名錄詳加檢閱若有悖謬最甚者察出參奏康熙二十六年十月初三日

諭大學士明珠學士禪布額爾赫圖舜拜

今當軍政之年聞斂取兵丁以為定規餽送兵部此等情事朕不傳旨指明然亟應禁絕又聞每年奏銷兵馬冊亦稱定規斂取兵丁餽送該部此皆勒索於軍民者也其弊亦宜永行禁止可傳諭兵部康熙二十六年十

月十八日

諭尚書鄂爾圖郎中伊爾克圖溫保

黑龍江至為要地兵丁勞苦朕罔不知曩者俄羅斯漸次入犯占踞我達呼里索倫等處擾害邊疆四十餘年無如之何後備足軍食永戍黑龍江以困逼之俄羅斯遂窘迫至極乃屢次求和今彼之使臣已來尚未曾至苟糧儲不足則如沙爾瑚達塔海等之往征而不能成功矣此事未經年遠朕親所聞知且亦衆所共悉也朕

所委曲區畫自盛京等處轉輸糧食及令所種米穀積貯至裕彼地大臣官員皆不思撙節濫給於無用之人苟且草率希圖軍儲罄盡勢必將彼等撤回彼等誠能以身家性命力保俄羅斯斷不來犯朕自撤回之也我之官兵撤回俄羅斯大衆難以齊來彼地將軍官員固皆稔知然或一二人或十餘人陸續聚集於黑龍江松花江之間構造木城盤踞其地則我取之維艱是俄羅斯為主兵而我反為客兵也今我惟多貯糧食永戍官

兵則我兵得逸而俄羅斯兵為勞矣如此則俄羅斯零
星來犯斷所不能欲大隊侵入則彼糧食何能挽運耶
若黑龍江我兵不行永戍自松花江黑龍江以外所居
民人皆非吾有矣爾等皆係選擇差遣往至彼處殫心
竭慮務期為久遠充裕之計詳加籌議惟此一舉也亦
無事再遣矣康熙二十六年十月二十四日

諭八旗都統三品以上官

凡人之行莫先於孝近者漢軍居父母之喪親朋聚會

演劇飲酒呼盧鬪牌儼如筵宴毫無守制之體至孝服
鞍轡等類所用素帛皆異常華美喪禮止當服用粗惡
豈宜華美耶居喪演劇滿洲所無漢人亦未有特漢軍
為然耳百行以孝為大如此所行以為孝道其他又何
足觀也又漢軍外官赴任每借京債整飾行裝務極奇
麗且多攜僕從致債主抵任索逋復謀贍僕從衣食勢
必苛斂於民以資用度且親朋債主疊往任所請託需
索不可數計是官雖一人實數人為之以致朘削小民

民何以堪又漢軍外官不能騎射乃自稱行獵多帶鷹犬歇宿邨莊滋害於民禽獸本在山野豈在邨莊耶又漢軍服用多僭越非分終日羣居以馬弔飲酒為樂此等物力從何而出有非苛取諸民者乎漢軍習尚之惡已至於極如原任總兵諾邁原任提督哈喇庫祖永烈等於任所多買良民帶歸原任總督張長庚原任巡撫張德地韓世琦等皆貪婪虐民居官甚劣今著漢軍都統副都統等凡有居喪演劇飲酒呼盧鬪牌者照賭博

例嚴行禁止在外漢軍官員任所有親朋債主前往請託需索貽累小民者亦令察訪指名題參朕此諭旨專為敦厚風俗陶淑人心而起使漢軍居官者皆似總督范承勲巡撫于成龍之善朕又何諭之有此旨令徐廷璽傳諭康熙二十六年十月二十六日

諭滿洲管漢軍副都統參領等

向因漢軍習俗不善故以爾等補授漢軍副都統參領欲訓練其騎射導率以矩範一如滿洲也近見並不教

以騎射凡事不能使之倣法滿洲反有不肖者恐嚇漢軍指摘其短希圖索詐此朕所深悉嗣後爾等務加悛改善為教訓漢軍可耳康熙二十六年十月二十六日

諭內閣

凡參劾貪官其受賄作弊之處因未曾親覩無所憑據畏縮而不行參劾者甚多今間有彈章亦止據風聞參劾耳豈有身與之通同受賄作弊而顧肯參劾之耶向者原有風聞糾彈之例

世祖皇帝時及輔政大臣停止今再行此例貪官似有
倣懼若有挾讐參劾者審明果係挾讐自有反坐之典
在可著九卿確議具奏康熙二十六年十一月二十日

諭內閣

近見支用修造等項奏銷錢糧時該部不准駁回者甚
多此等奏銷屢行駁回官員未必捐索補給亦止派取
民間耳如此則百姓愈苦向因需用孔亟故奏銷者未
即准行今公帑並非匱乏之時奏銷案件不必駁回應

即完給此等事不行駁回在官員雖稍獲便利而於百姓乃大有裨益也可傳諭九卿詹事科道康熙二十六年十一月二十日

諭大學士勒德洪明珠學士齊穡額爾赫圖舜拜
多奇凱音布趙山

今聞外藩蒙古出喀倫哨地有侵害搶擄喀爾喀之巴爾呼等蒙古者甚多以後著嚴行禁止毋使妄行其下理藩院確議以聞康熙二十六年十一月二十一日

諭戶部

朕惟自古帝王統御萬方又安九有單心懷保節愛攸
先期於物力充裕爰以振業黎元俾膏澤旁流咸蒙美
利朕自御極以來軫恤民依力圖休養惟理財為裕國
之大經蠲貸為愛民之實政歷年敦崇節儉嚴核浮冒
蓋欲為布德行惠之資頻年以來各省錢糧雖已次第
蠲免但江蘇所屬各郡縣為財賦重地額徵錢糧甲於
他省且累歲輸將供億効力維勤茲用大沛恩膏除漕

項錢糧外所有康熙二十七年應徵地丁各項錢糧俱著蠲免二十六年未完錢糧亦悉與豁免又陝西省錢糧前雖已行蠲免但念該省人民用兵之際轉輸餽餉効力可念再宜加恩以弘樂利其康熙二十七年應徵地丁各項錢糧及二十六年未完錢糧亦著俱與蠲免爾部速行該地方官通行曉諭務使小民均霑實惠以副朕愛育蒼生至意如有不肖官吏借端朦混及私行重徵者該督撫指名題參從重治罪如該督撫徇隱不

行糾舉或經參奏或被告發定行一併從重治罪爾部
即遵諭行特諭康熙二十六年十一月二十六日

諭刑部

朕侍奉

太皇太后朝夕承歡祇遵

慈訓竭誠奉養今者

聖躬偶爾違豫朕夙夜滋懼寢食靡寧仰冀

上天眷顧俯垂默佑惟思好生以迓

天庥寬大以延遐壽所有內外問刑衙門現監重辟人犯除十惡死罪及貪官光棍不赦外其餘已經奉旨監候死罪重犯概行減等發落以昭朕祈

天永佑至意爾部即遵諭行特諭康熙二十六年十一月二十七日

諭大學士明珠

太皇太后聖體違和以來醫治萬端罔克奏效未即安善甚為可慮朕靡朝靡夕不勝憂懼茲欲躬詣

郊壇虔行禱祀保佑

太皇太后慈躬和豫永獲康寧可將朕意傳示九卿康
熙二十六年十一月二十九日

諭大學士明珠

自

太皇太后違和以來朕在宮中無日不虔潔精誠默行
祈禱乃

太皇太后聖體大漸似無一分可以冀望矣如稍有可

望之機亦不敢起躬禱

天壇之念今竟毫無冀望何計可施惟有竭抒誠悃叩
祈

上天之眷佑耳竝非沽取虛名徒事粉飾為也

皇皇上天其可欺乎將此諭旨向諸臣傳示之康熙二
十六年十一月二十九日

諭內閣等衙門

朕自

太皇太后違豫以來心懷憂慮日侍

左右檢方調藥親侍飲饌

太皇太后寧憩之時朕惟隔幔靜俟席地危坐一聞
太皇太后聲息即趨至榻前凡有所需手奉以進因此
晝夜不能少離

太皇太后屢有德音命朕回宮少宜自愛朕念幼蒙
太皇太后撫養教訓三十餘年罔極

深恩難以報答今見病體依然五內焦灼莫知所措朕

躬寢處何暇顧計覽奏具見大小臣工愛君誠悃但當此時不竭心盡力少抒仰報之忱異日雖欲依戀

慈闈竭朕心力豈易得耶所奏已知之康熙二十六年十二月十一日

諭大學士勒德洪等

朕忽遭大故五中潰糜非不知恪遵

遺誥守身為重勉自節哀強進飲食但悲從中來情實痛切莫由自主以至昏迷即欲少餐饘粥亦不能下咽

非故却不御覽奏具見誠惻朕當強支自愛卿等無須
過慮康熙二十六年十二月二十七日

諭大學士勒德洪等

據奏元旦請朕還宮人主宮殿原多可以因時移蹕若
在庶民遭此大故所居止於一室又遷避何所回宮斷
不可行卿等念切愛君恐朕哀毀過甚諄懇再三勉從
所請強節哀情康熙二十六年十二月三十日

聖祖仁皇帝御製文第二集卷五